

四庫全書

子部

欽定四庫全書

子部

分門古今類事卷五

六

詳校官中書

臣朱文翰

檢討臣何思鈞覆勘

總校官中書

臣朱鈐

校對官中書

臣郭晉

謄錄監生

臣李逢堯

欽定四庫全書

分門古今類事卷五

異兆門下

張洎破瓜

呂洞賓仙翁多遊人間自言呂渭之後渭四子溫恭儉讓讓終海州刺史仙翁乃海州後張洎家居忽有隱士通謁乃仙翁姓名洎見之索紙筆八分書七言一絕留題頗言將佐鼎席意末云功成當在破瓜年俗以破瓜

為二八洎果六十四乃其兆也

西京記及神仙傳

盧杞宰相

唐盧杞未第遇仙姬曰麻氏以大葫蘆如二石甕令杞乘之騰入霄漢至一處曰水晶宮太陰夫人問以三事曰公有仙相能居此宮乎能為地仙時一到此乎能為中國宰相乎公願何事杞曰願為宰相夫人悵然遣還

後杞果相德宗

西京記及神仙傳

德璘巴陵

貞元中有鄭德璘者每歷洞庭湘陰遇一叟常以松醪
春飲之因悅嵯賈韋氏女以紅綃題詩戲贈後韋舟沒
于洞庭德璘作詩弔之云洞庭風軟荻花秋新沒青娥
細浪愁淚滴白蘋君不采月明江上有輕鷗至誠感應
詩達水府府君曰誰是鄭生所愛主者見紅綃而語府
君府君曰德璘異日是吾邑之宰況昔日有恩義相及
不可不活爾命乃令攜韋女逆鄭生推墮一池中沉浮
困溺時三更德璘未寢忽覺有物觸動舟遂秉炬照見

衣服采繡似是人物驚而拯之乃韋女也德璘喜駭良久女乃甦及曉方能言云府君感君而活我遂納為室感其異也後五年德璘當調集謀醴陵令韋氏曰不過作巴陵耳德璘曰子何以知之曰昔水府君言是吾邑之宰洞庭乃屬巴陵此可驗也德璘誌之果注巴陵後府君贈鄭詩曰昔日江頭菱芡人蒙君數飲松醪春活君家室以為報珍重長沙鄭德璘於是乃悟府君乃昔

日老叟耳

靈異傳

寇相毀廟

寇相準年十九蘇易簡狀元下及第知巴東縣縣舊有一廟不知其名舊令尹常夢其神泣告之曰宰相將來吾不敢居此雖強留必不容也令曰宰相何人神曰他日當自知不敢預告及寤與同僚言之不數日邸吏賁狀來乃寇為之代果以廟無名圖牒所不載而毀之噫廟之毀去神固知之而寇之為相已兆於此矣神謂留必不容蓋亦知寇公之正直也

青瑣

張誼赤光

進士張誼自鄂州來赴舉南省試罷榜未出間常與儕輩游飲于市偶一人前揖張曰先輩便當及第然宜保惜頭上二赤光光在公無事光失則公亦不免慎之忽不見後張果及第既授官到任官長有赫連立乃二赤光也不久赫連立卒張亦以事去官迺知事皆前定不可以智力免也

青瑣

韓澈靈語

乾元中韓澈授隴州吳山令素與宇文覲辛稷善並隨
澈至吳山讀書令廳前有大槐覲稷行樹下見一孔甚
潤澤中有青素昇為雲乃命掘之得一塚塚中有棺棺
中有齒髮及骨因令收之以新棺殮葬諸野後靈語云
是晉將軍契苾鐸戰死葬此塚近馬廐欲求遷改不可
得今明府恩及幽壤甚厚然創造此謀是宇文七及辛
四幽魂感戴豈敢忘之辛不久見將及第榮祿足光其
身宇文命薄無位雖獲一第終不及祿且多危難吾當

救其三死若或為正官則雖我亦不能救言畢乃去覲
家于岐山久之鍰忽空中語云七郎夫人疾亟適已往
救可無懼也後慎無食馬肉須臾報至如所語會莊客
馬死以肉饋覲覲忘其言而食之霍亂幾死鍰云何故
違約也遂疏方令服即愈後覲還吳山會岐賊僭偽覲
素有名被署為中書舍人賊平覲等繫獄鍰語覲妻云
七郎犯事我為求請事已解矣有劉使君至即得放出
尋而詔以劉晏為刺史晏奏賊徒點污名賢臣至州日

乞一切釋免上可其奏晏至悉放之覲既耻為賊污還家歲餘呂崇賁為河東節度奏覲為左衛兵曹河東書記勅至覲甚喜受勅拜蹈一奴忽仆地作鍰靈語歎息久之曰向謂汝勿作官何故受之此度不能相救矣覲云還之如何答云受畢何可還千萬珍重後四月覲遇疾暴卒昔王充論衡有曰凡人有死生壽夭之命亦有貴賤貧富之命命當富貴雖貧賤之猶逢福善離其貧賤命當貧賤雖富貴之猶涉禍患失其富貴以宇文覲

觀之其言豈不信哉

廣異記

琴僧江湖

李虞部畋知常州武進縣日有浙僧原式善鼓琴夏五月忽告辭往潤州金山寺去留之不諾曰原式起江湖之興遽雇得一村童已遷衣鉢就船矣因與書令達州牧崔屯田郡倖王持正既而原式至彼便辭郡守往金山寺宿日已暝矣館于下閣是夕楊子江颶風驟起鼓浪沃岸遂巡濤勢崩騰忽忽若有火燭飛於波上漲高

數丈至寺之半其下閣楹柱欄楯逐浪而去原式村童
寂無影響次日風浪漸息有一漁者撐船傍北岸遙聞
葭茨中有人呼之聲往視之乃原式之村童漁者遂載
之歸寺僧異其事送州牧州牧牒送晉陵時郡中僚佐
咸覩之皆言事不可測彼僧言有江湖之興隨暴流而
逝可矣彼村童者年始及冠於巨浪之中若一葉焉果
有神祐之歟是無江湖之興歟以是推之萬靈中各有

定分信矣

該聞集

狄公默祝

狄武襄公青本農家子年十六時其兄素與里人失其名號鐵羅漢者鬪於水濱至溺殺之保伍方縛素公適餉田中見之曰殺羅漢者我也人皆釋素而縛公公曰我不逃死待我救羅漢庶幾復活若決死者縛我未晚也衆從之公默祝曰我若貴羅漢當甦乃舉其屍出水數斛而活其後無人知者公沒其子諮詠護喪歸葬西河父老為言此元祐十年十二月五日與詠同館北客

夜話及之信乎人之富貴皆前定也眉山蘇軾記坡

集

文公出廳

王文正公旦知臨江縣時獄有死囚公一夜不寐思以計活之方五鼓空中有人喝直更速起相公出廳斯須果開門昇廳急呼囚問之其為相之兆已見於此時矣先是公之父中令晉公祐常曰吾子孫必有為三公者因手植三槐於庭以待之晉公知制誥二十年最號淹

遲歷仕太祖太宗文武忠孝天下望以為相而不用及
文正知制誥與父相去不十年入西掖牆壁間父翰墨
手澤猶在長城錢公若水風鑒最高與公同直史館常
曰王子明既貴且壽吾進用雖在其前皆所不及也東
坡嘗作三槐堂首叙其事曰寓物於人明日而取之有
得有否而晉公修德於身責報于天取必于數十年之
後如持左契交手相付吾以是知天之果可必也文多

不載

朝野
雜錄

歐陽求退

歐陽文忠公慶歷末水宿采石渡舟人睡鼾湖平月黑
公滅燭將寢微聞呼聲曰去來舟尾有答者曰今夜有
參政船宿此不可擅去齋料幸為攜至公私念舟尾逼
浦且無從人必鬼也通夕不寢五鼓岸上獵獵馳驟聲
舟尾者呼曰齋料幸見還有且行且答者曰道場不清
淨且無所得而歸但多嗟恨之聲公甚異之後半月游
金山與長老語之曰是夜有施主攜室至方拜忽思卧

遂乳一子俄覺鯉風滅燭大衆皆恐乃公宿采石之夜其後公果以叅知政事除蔡州銳於求退者亦其前知

也

夜話錄

鄭咸中允

鄭咸太原人當劉繼元拒命咸家苦于兵父子離散咸仗一劍而奔一日渡水舟覆同載者皆溺聞空中有人指呼曰救中允既而咸得岸不死然不知一舟中有不死者幾人中允謂誰也既抵温州定居舉進士後為武

寧幕以太子中允致仕卒始悟空中之言中允為已也

事之前定真可知矣

幕府燕閒錄

賈林侍御

唐德宗欲西幸有知星者奏云逢林即住帝曰豈可令朕止於林木間及奉天尉賈隱林謁帝帝以其名叶星者所奏召於卧内隱林陳攻守之策且奏曰臣昨夢日墜於地以頭戴之帝曰此來乃已前定遂拜隱林侍御

史廣德神異錄

董齊醫畫

董羽江左人善畫水太宗作端拱樓命羽四壁畫龍水羽極其精思半年乃畢羽時為翰林藝學意望功賞太宗一日與嬪御登樓皇子尚幼遙見畫壁驚啼不敢視命亟污漫之羽遂不獲賞又有齊繼邕者善為小兒醫初為翰林醫學忽皇女有疾呼之切脉皇女見人衣綠輒驚宮人遽以緋袍蒙之而入尋以白于上即賜緋鳴呼畫師醫工皆技也皇女皇子皆貴也董羽以之而無

賞繼邕以之而賜緋得非命矣乎

唐宋遺史

士寧得道

李士寧蓬州人語默不常或為得道常見東坡於成都

曰此子貴當為制策舉首已而果然自非數有前定烏

得而知之哉

唐宋遺史

范諷三品

范諷給事少縱酒落魄一日醉卧兗州堯廟殿中僕使

掖歸已死矣經一日而蘇言始為二紫衣吏所錄引入

官府立庭下有大官據案怒目而責之曰堯之為神孰不知敬子為儒者敢褻慢之諷但謝罪而已顧有司使付獄治之有吏自東廊捧簿而上曰諷當為三品官壽限尚遠大官者遂震呼戒而遣之使一吏伴送歸經廊間於窻隙中聞敲朴苦楚之聲窺之但火焰烘然聞聲而不見其人又至一處窺之見通天銅柱反縛金師子數十皆瞑目垂舌似不任其憊問其吏低語曰此歷代好殺之人并殺降之侯遭害者受生已盡則釋去然去

人天之位尚賒矣未幾而醒矣

幕府燕閒錄

洪濤辟官

洪濤字元賓南康星子人父亶為都官郎中除王府教授濤以太廟齋郎補學生好學惇固似不能言者熙寧三年登進士第為石州法曹叅軍一夕夢得官書一卷若除目內有某年月日都官郎中洪亶卒某年月日石州司法叅軍洪濤卒既覺神情牢落遂乞侍養至京師亶卒不踰夢中之日然濤期亦近乃急扶柩歸南康居

一日有吏卒數人參見言迎赴新官濤曰爾誤矣我方
在憂苦中豈有赴官之事吏曰非誤泰山辟君權判官
天符已下不可移也然不過半載却還未幾濤卒亦不
差夢中之日時濤妻徐氏胎已數月半年而生男酷肖
濤云

同前

孔公新廟

彭城都靈應天王祠在子城上西北隅唐節度使李愿
元和中建至孔給事道輔應舉時與馬僅周濟同謁卜

科名擲筮三人皆得吉兆而孔三擲之皆同又曰他日合來鎮此藩者當再得吉兆惟孔公得之後果諫議大夫知徐到治未久即新廟貌及落成苦祝文未能暢意竄改久之會顏淳之來謁公即命代筆其警句云裴寂昔年曾乞華陰之夢子房今日果如圯上之言孔公激賞曰神當恭以享斯言矣

同前

栢閣行者

錢若水家居新安於栢閣院獨居一室院僧裏公有小

行者時來室中翻亂文字點污筆硯乃白稟公請拘而笞之稟公曰此王氏子少孤不忍笞苦錢曰不然日授之以經可禁其擾人初授五行曰太少自十行至一紙以至一卷才經目便出走戲如初七日誦一部後一月授華嚴經八十卷忽一日上樹而去至夜不下竟不知所在後七年錢入洛陽逢勅葬一內人扶柩者四十輩錢于馬上忽認見其行者青巾布衫錢乃下馬使人召之欣然而來公曰向栢閣何適今乃為此賤役笑曰時

去嵩山本欲念却大藏經恐驚於人公相之曰君異人也請盡言之行者曰世間如某輩者千萬人人自不識公有仙風道骨可惜作官此去甚達然終不至宰相惟忌為御史臺官必不久又問壽如何曰轉官遲則壽亦遲言訖而去後錢公自布衣至兩府改登州觀察使兼御史大夫嘆曰王行者之言至矣心惡之果於是年十月二十三日暴卒時咸平六年也享年四十四夫祿壽修短其數前定則不可改知命君子委心而任之可矣

吳淑
閣間談

世則首冠

王世則韓見素趙諫同謁陳希夷世則詐為僕隸拜堦
下先生笑而降堦曰侮人者自侮也揖世則使坐諸生
之右曰將來君獨首冠諸公盡在此會也明年世則舉
進士果狀第其餘俱列于次以此益知科名之前定也

陳希
夷傳

延卿職官

郭延鄉洛陽人以文行稱嘗與呂蒙正張齊卿謁陳先生搏搏曰呂先輩當狀元及第位至宰相張先輩科名雖行間而福祿乃過於呂獨不言延卿他日謂張曰惜哉郭君祿薄須俟呂作相始得一命張作相乃得職官耳既而呂果登狀元第及作相薦延卿校書郎張果在行間及作相深念延卿潦倒語其子宗誨曰為我草一奏薦延卿京官翌日造朝遽索劄而宗誨誤書京為職字後畫二日降詔果止得職官希夷之言不啻目擊

信乎命之前定不可易也

同前

仲宣不出

許仲宣諫議罷成都牧致書于陳搏先生問以休咎先生令人代答云諫議此去更不出未幾而仲宣卒蓋先生知其將終而不復出也

同前

張生得官

唐兗州鄒縣有張生者忘其名字貞觀十六年欲詣京赴選塗經泰山謁廟祈福張遍看神像至第四子見其

儀容秀美祝曰但得四郎交遊何用仕宦行數里忽有數十騎至曰四郎拜謁又曰兄今歲欲赴選未合得官且途中有災張不以為然乃別去才百餘里果被賊劫乃默祝曰四郎何不相救有頃果至盡追捕之四郎曰兄還於此相見其年果不得而歸信乎一官皆先注定不可妄得也

真報錄

文叔遇俠

林文叔字野夫興化軍人治平間遊上都寓甘泉坊後

巷貧甚幾不聊生比鄰一孀婦年三十餘朝肩故衣出售暮即歸居之對門有茶肆文叔多坐其中婦人亦時來飲茗時初冬文叔尚衣暑服婦人憐之乃以全體之服與之月餘雪寒又以一衾遺之數日又以錢與文叔文叔愧謝婦人曰人有急難而不拯者非壯義士也後遂與文叔為婚問其姓氏祖先皆不答二歲育一子一夕同寢中夜失之文叔驚起燭以尋之杳然不見其戶牖則如故俄自天牕而下手携紫囊胷挿人首喘猶未

定婦人曰與子別矣子以我為何等人吾在仙鬼之間者率以忠義為心吾居此十年者吾故夫為軍使枉殺吾久欲報之吾上訴天下訟陰方得旨囊中取其頭示文叔曰此吾戮其神也執文叔手戀語曰吾觀子之面與氣祿甚薄有祿則壽不永宜切戒之可貨宅携緡歸故鄉溪山魚酒醉卧一生足矣何必區區利祿哉言訖躍出文叔依其言而歸壽八十餘而卒以此知祿薄而貪冒僥倖壽必不永錄之可為浮躁者之戒

翰苑名談

燕王遇張

張九哥不知何地人慶歷間遊京師人皆言有道者燕王常以酒與之一日詣門見王取足帛重疊剪為蜂蝶隨剪飛去或集王衣或聚美人釵髻王甚悅少選九哥曰恐失王帛乃呼之一一皆來復為羅一端王異之因問曰吾壽幾何曰王壽與開寶寺浮圖齊堅乃飲之以酒而去後浮圖灾王亦薨由此知壽夭固有定數而物亦不逃乎數也

翰苑名談

溫裕喜鵲

孔溫裕嘗以諫事貶郴州司馬久之得其兄尚書溫業書報云憲府欲辟作御史日望勅下又報云宰相以右史處之皆未有的耗一日喜鵲鳴於庭乃祝之曰願早得官鵲乃飛去墜下方寸紙上有補闕二字極異之未

幾果除此官

翰苑名談

薛珏注壽

天復末薛珏蜀人也性好善而不貪嘗於南斗北斗堂

燒奏後泛南海遇風吹抵一山遂登之見一宮殿有一
赤衣使者曰非薛珏乎珏曰然使者引入宮見一人昇
堂而坐使者曰拜真君真君曰子來何遲命使者引入
學士院遂至一苑題云選真國學士院珏曰何為選真
使者曰子居大唐一國耳珏見一案有報命童子檢之
童子取報狀云大唐所生益州有幾復何姓名命追益
州護皇杜克克曰所生計百居蜀者有十人五人為宰
相二人直翰林三人充諫臣既去珏求真君取生祿簿

注珏一百歲送珏登舟順風至姚州後歸蜀珏後果得
一百歲而害貧蓋不於真君前乞富貴爾

實仙傳

僧知宿命

吳僧文捷戒律精苦奇跡甚多能知宿命子羣從文通
者人多言其不壽一日問捷捷曰公更三年為翰林學
士壽四十歲後為地下職任與楊樂道待制聯曹公此
時當衣衰經文通聞之大駭曰數十日前夢見楊樂道
云受命與公同職事所居甚樂慎勿辭也後數年果為

學士而丁母喪年三十九矣明年秋捷忽使人與文通
決別文通急往見之捷驚曰公大期在此月何用更來
宜速還屈指計之曰急行尚可到家文通如其言馳還
徧別骨肉是夜無疾而終以此知萬事無不前定也
筆談

僧遇異人

熙寧七年嘉興僧道親遊鴈蕩山見一人衣布襦身輕
若飛心疑異人謂道親曰今宋朝第六帝也更後九年

當有疾可持吾藥以獻此藥人臣不可服乃探囊出一
丸如金錫曰龍壽丹也又謂曰明年歲當大疫吳越尤
甚汝名已在死籍勉修善業當免此患又出一栢葉與
之道親即食之老人曰定免矣至癸亥六年夢老人曰
時至矣何不詣闕獻藥遂惶懼詣秀州具述本末州詣
省獻之未數日上果不豫乃使道親詣鴈蕩於初遇處
焚香而還上尋康復謂輔臣曰此但預示服藥兆耳其
藥在彰善閣當時不曾進御

筆談

釋氏宿因

天竺第十五祖迦那提婆常至毗羅國遇一長者有子
曰羅侯羅多隨師出家尊者曰昔如來記此子當五百
年後為大教主今之相遇蓋符宿因遂與剃度即第十
六祖也傳法眼至第十八祖伽邪舍多嘗行到大月氏
國見一婆羅門舍有異氣尊者入見其主鳩摩羅多開
闢延接尊者曰昔世尊記云吾滅後一千年有大士出
現于月氏國紹隆無化今汝值吾應斯嘉運於是鳩摩

發宿命智出家付法又至第二十二祖婆修盤頭時有
一羅漢名賢衆至羅閱城毗舍佉家謂其人曰汝婦懷
聖子當為世燈慧日然必生二子一名婆修盤頭二名
芻尼昔世尊在雪山修道芻尼華云野
鵲也巢於頭上佛記
云汝至五百年生羅閱城毗舍佉家與聖同胞今無爽
矣後一月果產二子婆修盤頭即其一也自是法衣相
傳至二十六祖不如密多者南印度德勝王之太子也
既受度得法至東印度謂其王曰此國當有聖人繼我

是時有婆羅門子年二十許幼失父母不知名氏自言
纓絡故人號纓絡童子尊者見之曰汝憶往事否曰我
念遠却與師同居師演摩訶般若我轉甚深修多羅今
日之事蓋契宿因尊者曰此童子非他即大勢至菩薩是
也此聖之後復出二人一人化南度一人緣在震旦四
五年却返此方遂以宿因名般若多羅付法眼藏即第
二十七祖既得化法至南印度彼王三子其季菩提多
羅遂為法嗣改名菩提達磨尊者謂曰汝未可以遠遊

且止南天待吾滅後六十七載當往震旦即六祖之第一也尊者演說八偈皆預識佛教隆替後皆符契嗚呼釋氏號為空門以解脫為法冥乎超出於造化之外非數世之所能拘然其興衰隆替猶有前定觀其或五百年或一千年或化南印或度震旦如來皆密記之而後無不驗孰謂區區世俗而可逃乎

傳燈錄

釋氏留難

天竺第二十四祖師子比丘姓婆羅門既傳正法眼藏

於婆舍斯多即謂之曰吾師密有懸記罹難非久遂以
僧伽黎衣付之俾之他國隨機演化斯多受教直抵南
天尊者以難不可苟免獨留罽賓國時此國有外道二
人學諸幻法欲共謀亂乃盜為釋子潛入王宮事敗王
怒乃破毀伽藍祛除釋衆王自秉劒斷尊者首涌白乳
高數尺王之右臂旋亦墜地七日而終至第二十七祖
謂菩提達磨曰吾滅後六十年佛法有留難水中文布
自降之逮尊者順世達磨演法化被南天聲馳五印果

六十載值異見王輕毀三寶達磨念波羅提與王有緣
乃謂曰汝法有難汝宜往救波羅提乃見王廣說法要
王心開悟悔謝前非師言水中文布即波羅之廩語也
達磨心念震旦緣熟行化時至乃辭王曰吾去非晚一
九即回達磨汎重溟達于南海宕梁普通八年丁未歲
見武帝不契潛回江北屈于洛陽當魏孝明太和十年
時傳法于慧可大師恰九年矣欲西返天竺乃告慧可
曰吾滅後二百年衣止不傳法周沙界遂端居而逝慧

可大師當第二十九祖乃震旦之第二祖也後傳法衣
于僧璨大師既示以偈又告之曰汝受吾教宜處深山
未可行化當有國難昔達磨傳般若多羅懸記云心中
雖吉外頭凶吾校年代正在于汝師遂隱于舒州皖公
山屬後周武帝破毀佛法師居處無常人無知者遂免
于難心中吉蓋周字也嗚呼屯厄危難在佛法猶有定
數雖佛之神力知而不能救信乎馮道之言不誣也

傳燈

六祖遇難

六祖慧能大師范陽人姓盧氏盧行者是也傳信衣與法于洪忍大師初達磨云吾滅後二百年衣止不傳自魏孝明太和十九年至唐先天二年恰當其數於是慧能大師曰吾受忍大師衣法今為汝等說法不付其衣將示寂或問後莫有難否曰吾滅後五六十年有一人來取吾首聽吾記曰頭上養親口裏須殮遇滿之難楊柳為官至開元十年八月三日夜衆聞塔中有聲見一

孝子從塔中走出果見師頸有傷具以賊聞時縣令楊侃刺史柳無忝得即擒捉其賊人姓張名淨滿受新羅僧錢令取六祖首供養師之所記至是皆驗此豈非前

定事歟

傳燈錄

分門古今類事卷五

欽定四庫全書

分門古今類事卷六

夢兆門上

呂錡射月

魯成公十六年晉楚戰鄢陵晉呂錡夢射月中之退入
于泥占之曰姬姓日也異姓月也必楚王也射而中之
退入泥亦必死矣及戰錡射共王中目王召養由基與
之兩矢使射呂錡中項伏弋以一矢反命嗚呼周禮春

官大卜掌三夢之法即三代之夢或占而辨之也夏曰致夢商曰觭夢周曰咸陟致之言至也觭之言得也咸陟言皆得也謂神所至皆可得而占之也呂錡之夢固甚異而占之者不亦妙乎

左傳

穆子號牛

穆子初去叔孫氏及庚宗遇婦人食而宿焉適齊娶國氏生孟丙仲壬夢天壓已弗勝顧而見人黑而上僂深目顴喙號之曰牛助余乃勝之旦而召其徒無之且曰

志之及魯人召之不告而歸既立所宿庚宗婦人獻以
雉曰余子長矣能奉雉而從我矣召而見之則所夢也
未問其名號之曰牛曰唯遂以為豎有寵長使為政田
於丘猶遂遇疾焉豎牛曰夫子疾病不欲見人使寘饋
于介而退弗進則置虛器命徹叔孫不食卒

左傳

公孫亡曹

曹人或夢衆君子立于社官而謀亡曹曹叔振鐸請待
公孫彊許之旦而求之曹無之戒其子曰我死爾聞公

孫彊為政必去之及曹伯陽即位好畋弋曹鄙人公孫
彊好弋且言畋弋之說悅之因訪政事說曹伯背晉而
奸宋人伐之執曹伯陽殺之曹遂亡嗚呼曹伯陽之與
叔孫豹禍由二人而皆徵發于夢豈非命已前定乃憑
夢而效靈歟李蕭遠謂吉凶成敗各以數至信矣

左傳

蔡茂三禾

蔡茂字子禮河內懷人也仕建武中初在廣漢夢坐大
殿極上有三穗禾茂跳取之得其中穗輒復失之以問

主簿郭賀賀慶之曰大殿者宮府之形象也極而有禾
人臣之上祿也取中穗即中台之位也於字禾失為秩
雖曰失之乃所以得祿秩也衮職有闕君其補之旬月
代載涉為司徒乃辟賀為掾昔黃帝問岐伯曰夢者謂
何岐伯之對以神氣發越精識感通有吉夢之殊祥而
釋氏以四法判夢亦有善惡之先兆其意謂命已前定
往往兆形於夢寐耳詎不信哉

後漢

王濬三刀

王濬字士治弘農湖人為廣漢太守嘗夜夢懸三刀於
卧床屋梁上須臾又益一刀遂驚覺意甚惡之主簿李
毅賀曰於文三刀為州字又益一者明府其臨益州乎
及賊張洪殺益州刺史皇甫晏果遷益州刺史東坡詩
有不羨三刀夢蜀都正謂此也

晉史

周勤晝寢

賈充字公閭晉初伐吳時充屯項城軍中忽失充所在
帳下都督周勤時方晝寢夢見百餘人錄充引入一逕

及覺聞失充乃出尋索覩一逕即所夢之道果見充至
一府府公南面坐聲色甚厲責充曰吳寇當平汝方表
斬張華何闇慙也終當使係嗣死於鍾虞之間太子斃
於金酒之中小子困於枯木之下言畢遣還後少子賈
謐與賈后謀敗果戮之西鍾下賈后服金酒而死賈午
考竟用大杖皆如其言

晉史

周宣占驗

周宣字孔和樂安人也妙於相夢為郡吏太守楊沛夢

人曰八月一日曹公至與君杖飲以藥酒使宣占之時黃巾賊起宣曰杖以起弱藥以治病八月一日賊必除滅果然文帝問曰吾夢殿屋兩瓦墮地化為雙鴛鴦宣曰後宮當有暴死者帝曰吾詐卿耳宣曰夢者意也苟以形言便占吉凶言畢黃門奏宮人相殺無幾其餘效甚多具見本傳

三國志

陶侃天門

陶侃嘗夢生八翼飛上天天門九重已登其八唯一門

不得入閤者以杖擊之墜地折其左翼及寤左臂猶痛
後位至八州都督潛有窺窬之心每思折翼之祥自抑

而止

晉史

彥回著具

褚彥回少時嘗夢人以卜著一具與之遂差其一至薨
年果四十八

南史

慶之足絹

沈慶之嘗歲旦夢有人以兩足絹與之謂曰此絹足度

寤而謂人曰老人今年不免矣兩足八十尺也足度無盈餘矣及薨果年八十嗚呼死生有命子夏嘗言之矣
觀彥回慶之夢毫釐不差謂修短非前定可乎

南史

慶遠褥席

柳慶遠字文和從父兄世隆嘗謂慶遠曰吾昔夢太尉以褥席見賜遂亞台司適又夢以吾褥席與汝汝必光我門族後慶遠果繼世隆焉

南史

伯玉腋翅

荀伯玉廣陵人齊高祖親待之嘗夢上廣陵城南樓上
有二青衣小兒語伯玉云草中肅九五相追逐視城下
人頭上皆有草泰始時又夢高帝乘船在廣陵北渚兩
腋下有翅不舒問何當舒曰却後三年伯玉夢中自謂
呪師凡六唾呪之有龍出腋下翅皆舒還復歛元徽二
年高帝破桂陽五年廢蒼梧王謂伯玉曰卿夢今旦効
矣

南史

吉瞻鹿皮

吉士瞻字梁容馮翊人嘗夢得積鹿皮從而數之有十一領及覺喜曰鹿者祿也吾當居十一祿乎自其仕進所蒞已九及天監二年進西陽武昌二郡太守心甚惡之果遇疾卒于郡

南史

鮑泉朱衣

鮑泉字潤岳侯景之亂被殺於江夏沈其屍於黃鵠磯初泉夢著朱衣行水上及死舉身帶血而沈於江悉如其夢夫夢之說多矣周官有六夢之辨洪範有三明之

占周宣謂夢出於意衛玠謂夢有於因獨釋氏以四法判之有善惡先兆之證繇斯之說以驗吉瞻鮑泉之夢其理尤為殊勝矣

南史

豆盧名亭

豆盧署本名輔貢貞元六年下第以文謁信安郡守鄭式瞻甚禮之謂曰子復姓不宜兩字名改之如何其夕夢一老人謂曰聞使君與子改名當四舉乃成後二十年在此為郡守因指郡隙地曰此可建亭臺既寤思之

四者署也遂以為名既二年又下第為夢無證更二年果登第蓋自更名後四舉也太和九年署自秘書少監為衢州刺史既周覽郡內得夢中所指隙地遂建一亭名徵夢亭命之前定灼灼如此躁進者鑒之可少抑焉

奚陟推案

奚侍郎陟少年未從宦時夢與朝客二十餘人就一廳喫茶時方甚熱陟東行首坐茶起西行自南而去二盃徐行不可得奚渴甚不堪久忍俄有一吏走入肥大抱

簿書近千餘帙以案置筆硯請判陟方熱又渴兼惡其肥忿之乘高推其案曰且將去濃墨滿硯正中文書之上并吏人之面手足衣服無不沾污及覺錄之藏於巾笥後十五年為吏部侍郎時方以茶為上味日加修潔陟性素奢先為茶器一副餘人未之有也時正熱飡罷請同舍外郎就廳茶會陟為主人西面首坐坐者二十餘人兩甌緩行又茶至揖客自西南面始雜以笑語其茶益遲陟先有痼疾加之熱甚茶不可待躁悶頗極竣

巡一吏肥黑抱大文書蘸筆硯滿面漑汗陟忿惡之乃
於堦上推曰且將去案倒正中令吏面上及簿書盡汚
座客大笑陟方悟昔年之夢取記事驗之更無分毫之
差嗟乎陟之貴為吏侍已先定於十五年前固無足怪
而茶甌之行文案之推吏書之沾汚亦復皆有定數豈
偶然哉因備錄之以為世戒

逸史

杜牧改名

杜牧之嘗於宰執求小儀不遂請小秋又不遂忽夢人

謂曰辭春不及秋昆脚與皆頭後果得比部員外又嘗
夢人謂之曰爾當改名為畢及覺牧之曰吾其死矣未

幾果卒

金華子

良弼獻詩

李良弼故給事中防之子大中祥符二年應進士舉同
學究及第授應天府司士給事知鄭州良弼將行夜宿
中牟夢人持詩版獻之曰九霄丹詔三天近萬疊紅芳
一旦開日月山川須問甲為君親到小蓬萊覺而白於

父給事喜曰汝必有前程至鄭而別五年六月十九日
良弼卒于應天府給事大悲痛夢之不誠也後張君房
與給事同舟至應天且憩泊間細詰良弼卒殯之日月
及葬地之所而繹之乃省其詩蓋良弼丙戌生年二十
七即詩首句云九霄丹詔三天近三九二十七夢時年
二十五故云近也萬疊紅芳一旦開者萬葉之花一旦
開盡即是向衰謝之意也日月山川須問甲者其年六
月十九日甲寅乃其卒也殯是二十九日甲子葬于府

東甲地此是日月山川須問甲也六月又天德月德俱
在甲為君親到小蓬萊乃虛無寂寞之所也給事潛然
曰是矣以此知死生日月皆有前定欲追得乎哉

性說

范公捧詩

范仁恕字超光盧質辟為同州錄事叅軍經蒲津浮梁
有釣師鬻一大魚鱗鬣頗異乃市而放之河流一夕夢
驛舍中廳西俱變為水有朱衣人自水中出捧詩一首
以獻云感公脫蒲津之厄惟公富貴壽考固已前定更

不敢言今報公他日之事詩云欄馬遇孫陽超光力自
強北林花正發西江彩筆香萬彙須經手千年事更長
感君施大惠從此佐吾皇後果為先主辟入蜀孟氏據
兩川自御史中丞拜左僕射平章事凡十六年在位授
太子太保致仕壽八十七歲

勝說

蜀主竹簽

廣政末年蜀主夜夢一神人問何人曰臣監饌來日常
饌餉餅中有一小竹簽恐不顧食之有悞聖躬明日進

食果於餅中尋得一小竹簽甚異之餅司以神告免戮
至明年又夢前神問有何事但云神來辭再詰不答乃
拜而去至明年國亡嗚呼一餅之食一簽之悞猶有前
定神得而知之況興亡者乎

成都
廣記

之遴折臂

劉之遴嘗寓居南郡忽夢前太守袁彖謂曰卿後當為
折臂太守即居此中之遴後牛奔墮車折臂歎曰豈黥
而王者乎後果再為此郡

南史

鴻漸相位

杜鵬舉父嘗夢一大碑云宰相題名碑因問守者有姓
杜人否曰唯有二人其名皆從鳥於是名其子為鵬舉
又謂之曰汝為相則世世名子皆從鳥後生子以鴻漸
名之果繼登相位焉

唐宋
遺史

羣玉仙籍

進士牛益萊州人一日出東都門息柳陰下俄然困怠
夢至一處高門大第若宮觀狀一吏云此羣玉宮也載

神仙名籍少選有乘馬而至者乃故人呂內翰臻謂益
曰吾掌此宮令子一見以消罪戾益執公帶而入見大
殿殿上皆大碑蒙以絳紗公命益立砌下公升殿舉紗
益望之見白玉為碑朱書字其上有大字云中洲天仙
籍其次皆姓名益惟識數人所識者乃丞相蘇易簡丞
相李迪尚書余靖龍圖何中立而已公下殿與益坐一
小室益曰天仙之詳可得聞乎公曰自有次序真人而
上非子可知也道君次真人天仙次道君地仙次天仙

水仙次地仙地上主者次水仙率皆立功行進補方遞升仙階益曰所見者皆當世公卿何也公曰今世之守令亦異於常况公相登金門上玉堂日與天子謨道者乎此固非常人能至益曰今見居世之卿相皆仙乎公曰十中七八益曰諸公出入廊廟高卧伊洛國之故老豈其仙也公曰真仙者皆玉臺真人况有壽年九十三歲方還崑府益曰公今何職公曰吾更三百年方補地上主者益曰主者是何官公曰今之掌五岳四瀆名山大川

者也公曰子可歸矣命一吏送之益俄而覺身在古柳
下夜已一更傍有巡卒守之曰子病乎何故如此益不
告之遂宿都門外邨明日為詩題壁而去詩曰須信出
塵事分明在目前幾多浮世客俱被利名牽益嘗與人
語此其詩至今猶存焉

青瑣

孟震附尾

鄆州孟震已殿試將唱名夢與衆人欲度水無舟一馬
涉過震將附尾有人止之見攀而過者三十餘人又一

馬過震乃附尾而濟焉明日賜第榜首馮京又三十餘
人有馮直方次乃及震焉

幕府燕
閒錄

吳淑丹陽

吳淑未冠時其先人為潤州書記時嚴續相公作鎮書
記宅在子城西門一夜夢兩過門外有項嚴相策杖躡
履淑隨之忽顧謂曰與汝丹陽尉寤而志之明年東海
徐鉉解淑淑登第因以女妻之淑欲求都下一官徐鉉
時在中書謂曰已選得一縣可二百里內淑思之曰得

非丹陽乎及領官果如所夢云

秘閣
閒談

思道點閱

員外郎阮思道在江南圍城中夢與官員數千百人為
官府點閱首唱曰舒雅雅應喏即過次曰陳淨淨次阮
思道思道趨過更呼問曰姓阮為是苑思道否對曰阮
其人曰疑是苑但過但過時城已危思道以為必不得
免冥司閱鬼籍而已在其中也及昇州平後各官以次
朝見先命殿前楊公閱名初呼雅次呼淨次呼思道既

過復問姓阮為是苑思道耶對曰阮也楊曰疑是大苑
但過因恍然憶所夢一一符合噫行止語默信有前定
何阮君之夢若是之異乎

同前

丘旭定分

丘旭江南人進士登第累任州縣後秘監李至奏舉為
秘閣官辭之乃得臨淮令嘗見天淑有徒勞之歎吳曰
向李秘閣舉君君何不欲旭曰誠悔之然亦有定分旭
在江東夢至一處滿目是山指一山問人云此何山曰

雲臺山及歸朝除閬州蒼溪令羣山滿目指其一大山
問縣人乃云是雲臺山又嘗夢為淮泗官上木杪看水
此至臨淮果大水乘舟從木杪過豈非前定乎由是言
之非人事明矣

同前

虛已賜緋

李虛已為遂州通判時太宗勤政急於至治知通皆給
紙為歷以書一任課績罷日考能否以黜陟至是紙自
內出以天詞戒勵敦勉之御翰親題卷首已賜數人矣

至虛已受賜乃為詩二十韻以謝上善之召賜章服仍
賜錢五十萬初虛已進詩而未被召往詣殿中侍御史
陳稭稭曰昨夜夢與君坐談謂君曰今日見君明日君
當賜緋今見君正如昨夢中豈明日賜緋乎虛已不以
進詩告但曰豈敢望至明日果有是命然形於他人之
夢何耶

同前

沈昶鄂字

沈昶者其父為兩浙大將昶好學能詩尤工筆札精篆

法而困於下位侍御史龔穎丁母憂與昶常往還一介夢
門上書一鄂字而從四口明日以語穎皆未曉其故後
轉運使以昶勤幹移監鄂州酒稅及入州門見上題鄂
字從四口一如夢中所書蓋陽水篆也初昶在漢陽又
夢着靴履水而過登岸入府署見漢陽監軍鄭文寶在
後問文寶曰君自何所來對曰自武磯來及是昶渡江
州中官吏皆江際迎接昶乃著靴入船及入州見廊廡
一如所夢文寶時為武磯巡檢以公事至州昶不知之

問其所自乃云武磯來其符合如此信知動靜語默皆前定也

同前

李迪玉魚

李迪德宗時為司勳郎中一日朝歸馬上昏昏如醉入宅謂其夫人曰適夢見二黃衫人引至一戶欲入有人曰未要來須待玉魚符下乃醒焉何也後入朝朝堂地無纖埃忽見玉魚一光瑩奪目遽取之歸殊忘玉魚符之事其夫人見之頗省前事潛不樂果數日而逝死生

已定烏可追哉

戎幕閒談

馮僕方響

馮僕即尚書謚之子也舉進士藉藉有聲一夕夢登崇孝寺幡剎極高處打方響時有徐文幼能圓夢乃往詢之徐曰雖有高聲須至下地洎春闈而僕乃登第於韓熙載榜下或以責徐徐曰後當有應果放榜數日中書奏主司取士不當乃追榜御試僕覆落乃高聲下第之

應也

南唐近事

程負鷄行

程負舉進士將逼試夢烏衣告曰君與王倫廖衢陳立
張沅同及第負喜馳馬省門見楊遂張觀曾顓立門內
而已乃逐鷄行遂悵然而覺是年考功張泌權知貢舉
果放楊遂等三人而負輩不應既夏內降御札尚慮遺
賢命張洎就中書重定詩賦務在精選洎果取負等五
人附來春別榜及第明年歲在癸酉鷄行之應也異哉


異哉

南唐
近事

徵古太守

李徵古宜春人少貧賤嘗宿司郡潘張史家潘妻夢門
前衙儀甚盛云太守在此既見乃寓宿秀才也覺而言
於潘遂厚待之李至京既及第不二十年自樞密副使
除本州刺史離闕日元宗賜內酒二百瓶既入宜春界
徧賜耆舊親知為政公嚴壁立千仞惟馳車迎潘姬延
留數月以銀五百兩贈報亦一代之奇異也

南唐近事



分門古今類事卷六

欽定四庫全書

子部

分門古今類事卷八

詳校官中書臣朱文翰

檢討臣何思鈞覆勘

總校官中書臣朱鈐

校對官中書臣郭晉

謄錄監生臣李逢堯

欽定四庫全書

分門古今類事卷七

夢兆門中

張鷟乘驢

張鷟少時曾夢一大鳥紫色五彩成文飛下至庭前不去告其父祖云此吉祥也鳳鳥有五色赤文章者鳳也青者鷟也黃者鵷鷖也紫者鸞鷟也此鳥為鳳凰之佐汝當為帝輔也因以名之後舉進士制策為岐王屬夜

夢著緋衣乘驢睡覺自怪我綠衣乘馬何衣緋却乘驢
尋改授鴻臚卿乘驢之應也未經考改授五品衣緋之
應也前定如此是豈以智力得之哉

宣室志

竇叅半臂

竇叅為御史中丞夢德宗以半臂文錦賜之解者曰半
臂股肱之衣公將遂居其位乎不數日果大拜

宣室志

劉檀改名

蜀員外郎劉檀本名審義忽夢一縷服人引令上檀香

株謂之曰君速登劉乃登遂向懷中出緋衣令服之覺
因改名檀未及一年會郡牧請杜評事充倅職奏授殿
中侍御史賜緋勅下杜丁憂不行杜遂舉劉乃奏檀與
杜所奏擬無別劉方閒居力困杜乃遺劉以新緋公服
一領果符其夢焉

蜀異記

少卿領馬

蜀有朱少卿者不記其名寢旅舍中夢有人叩扉覓朱
少卿聲甚厲覺訪之無影響復睡夢中又連呼之俄見

一人手中執卷云少卿果在此朱曰吾姓即同少卿即不是其人遂卷文書兩頭只留一行以手遮上下果有朱少卿三字續有一人自外牽馬一疋直入云少卿領取朱視之其馬無前足步步側蹶匍匐而前其狀非常苦楚朱大驚覺常自惡之後蜀主開國有親知引薦累至司農少卿無何膝上患瘡雙足自膝下俱落痛苦經旬五月五日殂乃夢馬之兆也

洞微志

盧絳白衣

金陵之陷有盧絳者圖興復李氏朝廷以節鎮招之絳
遂自歸後以事乃被誅初絳舉事日夢一白衣婦人酌
酒歌菩薩蠻以送之詞曰玉京人去秋蕭索畫簷鵲起
梧桐落歌枕悄無言月和殘夢圓孤衾惟暗泣何處砧
聲急獨自凭欄杆芭蕉生暮寒歌已謂絳曰他日於固
子坡相見後果伏法於固子坡行刑者姓白噫禍福由
於天道吉凶灼乎鬼神數之前定固可畏也

洞微志

希濟金介

蜀御史中丞牛希濟文學豪贍超於時輩自云早年未
出學院以詞科可以俯拾或夢一金介人曰郎君分無
科名四十五方有官祿覺而異之旋遇喪亂流寓於蜀
依季父給事中牛嶠仍以直氣嗜酒為季父所責暫寄
巴南旅寓開國不預勸進又以時輩所排十年不調為
先主一日召對除起居郎累加御史大夫向者之夢何

其驗歟

成都記

潘洞篆銘

潘度支洞景德二年將逼御試夢入一宮既升堂坐間
昏霧四合良久漸開見四壁下乃大碑石誌且往看之
皆人之姓氏即不能一一記憶題額上有大篆四句云
蒼壁禮天日月麗天龍化為蛇衆人咨嗟翌日說之意
甚自忌及放榜即第十七名後半載方釋之蒼壁禮天
天府第六名解送也日月麗天南宮第二名奏薦也比
放榜即十七名及第蓋出等甲即龍化為蛇也意亦不
顯達年五十餘度支員外校理而卒噫以此知名高下

亦繫冥數矧科第與祿位富貴者乎奇哉

勝說

劉詠看榜

劉國博詠趣向高絕場屋間凡有所聞必以相告咸平
二年春鑠院僅月餘時錢內翰最有名譽衆以甲科推
之詠忽夜夢往省前探問名第見一人問之曰錢十二
作狀元否其人曰未知且相隨看榜至省院門煙霧昏
翳殊不相下其人乃炬火相喚曰來看錢十二只于地
上畫一圍子立皂小旗二口白小旗二口火即滅次問

王巖得否其人又炬火見圍中有石一塊如拳又問王
衢得否見圍中有皂莢三挺問張尹方及宋某得否圍
中無物火滅問高四得否圍中見大書一益字中間立
大刀一口光閃閃驚覺向曉思之皆不可辨僧下端為
占之曰錢狀元未可固必此乃皂白交錯耳王衢第三
名定也王巖即當及第蓋石者山之類也惟高四莫解
張宋二君必未得蓋圍中無物爾豎榜出乃孫豎作狀
元錢希白次之王衢第三人高輔堯第五詠乃悟曰王

濬夢四刀而得益州益字中立一刀乃五數也神哉神

哉同前

觀文榜尾

于觀文字夢得射洪人性清潔富於文學別業有林泉
之致乃陳拾遺之舊鄰也下第後獻主司鳳玉賦為時
所稱明年復省試夢人以軸文與之曰此春榜也可收
之既覺自謂曰委我收榜吾當為榜尾乎言訖院吏報
先輩第九人是年只放進士九人果符所夢乃作詩云

東堂令吏報來時仙桂云攀第九枝乍聽吉音猶似夢
却思公道即無疑寒門髣髴春將到幽徑朦朧月漸移
殘漏聲中鞭馬去紵袍重戴已相隨嗟夫禮有六夢事
有萬變為真為妄不可測知然感兆於精神者而吉凶
可見若觀文之立志精確宜其感通之兆速於影響非
至誠感神者歟

該聞錄

蘇協愁字

蜀進士蘇協字表微鹽泉縣人幼寒素力學為文典瞻

正雅偽廣政十九年賈珪下及第入試前一日宿聖壽寺僧房夜夢入一官廨中屏上有大書一愁字於廳後復見置一秘器甚高大既覺惡之術士周世明占之曰此吉兆也蓋愁者不樂之祥有秘器而高大君之子孫當有至大官者是年協果登第掾於閬中又夢入一大府伏謁上官儀衛甚盛唱言與協官授廣都曹遂覺乃誌之於書冊蜀有廣都縣又終不在此邑既歸朝掾於懷汝洛三任及太平興國五年其子易簡狀元及第踐

歷清要特旨授協開亡曹仍賜朱紱易簡頗懷喜懼歲
餘而協遂卒易簡後叅大政子孫世為顯宦其兆皆已
先於三紀之前矣語曰死生有命富貴在天士大夫不
知命者觀此可以抑浮躁之志

燕闕錄

李畋見塔

景德二年李虞部畋與友張及張達楊交俱拔鄉薦奏
名預殿試未唱名前一夕張及夢乘一筏涉浪觸岸而
覺李夢遊開寶寺中路見寺塔數級出雲外達夢以刀

剪爪而中折交夢東華門外候唱名舉人皆倒立既曉
相會互言其異往興國寺謁圓夢僧解之僧云乘筏涉
水必捷也雲外見塔高級也錯刀中折不利也舉人倒
立非常也次日臨軒及果乙科及第達果不利交夢舉
人倒立蓋是李迪南省居榜末至御前居第一果非常
也李畋不預唱名三省其夢乃知塔者塌也雲外見之
御前下第之象也故李有詩云省奏名應誤僧圓夢亦
虛是知所得一第皆陰注陽授豈人之能耶

該聞
錄

孫偓踐木

孫偓未殿試前夢積木數百而踐履其上自謂必作狀元居衆材之上後唱名果然

撫言

范政送藥

著作佐郎楚寔大厯中疫厲篤重十日昏迷不知人事一日忽夢黃衣女道士至謂寔曰汝有官祿壽命未合死因呼范政將藥來忽見小兒持瑠璃大角碗傾藥令飲飲畢便愈及明乃許叔異令人送藥來寔疾久困初

不開目及見小兒與椀皆昨日所夢因呼小兒是范政
否問之信然其疾遂愈寔之官祿壽命已有前定宜其
未死而小兒之名與椀亦復預見於夢中信乎一飲一
啄皆非偶然

勝說

鍾輻種松

鍾輻嘗作山齋手種一松於齋前是夜夢朱衣吏曰松
圍三尺子當登第後三十年始成名松圍果三尺異哉

撫言

陳公荆南

乾興中張君房作倅江陵時知府李坦之得風病府事
不舉即漕使王湛發遣未聞新知府之耗時禮部陳從
易主漕運於荆湖南路由衡之邵讞獄之疑者去邵兩
驛間艤舟水濱夜宿佛寺中時女使一名中宵忽魘遽
起呼之既悟曰適見一白衣人戴帽儀容頗肅以手抑
脅曰學士得荆南也我是荆南五郎來告之到日望照
管陳甚異之比到郡後果馬遞勅到如夢之告陳後到

府禮上遂謁廟乃與君房語之蓋五通廟先為坦之毀
拆至是乃再葺之如舊可不異哉

青瑣

厚之翰林

元厚之少時嘗夢人告之曰異日當為翰林學士須兄
弟數人同在禁林既寤厚之自思素無兄弟疑此夢之
不然及熙寧中厚之果除學士同時先後入院者一
人楊元素繪而厚之名絳五人名皆從系始悟兄弟之
說嗚呼造化小兒將以此戲人歟何前定如此耶

筆談

裴頭黃尾

盧求應進士舉一夕夢人告云裴頭黃尾三求六李覺而志之及榜出裴求為狀元黃駕末名三人名求六人姓李皆如夢中之語云

撫言

龍首山人

本朝楊狀元真連魁天下英俊時彥皆以楊三元呼之釋褐不久臥病乃曰吾此疾恐不起矣家人驚問公曰吾以夢證之也吾昨夢至一處若王公大人之居有一

人持一板云楊某受龍首山人龍首者以吾今作殿元
山人無官爵之稱也此疾愈吾當道服游林泉下不復
趨仕路矣已而果不免惜夫

撫遺集

蔡齊狀元

真宗好文雖以文辭取士然必視其器識每御崇政賜
進士第必召高第三四人並列於庭察其形神始賜第
一人或取其文辭理趣超遠者蔡齊置器賦云安天下
於覆盂其功可大徐奭鑄鼎象物賦云足惟下正詎聞

公餗之歆傾鉉乃上居實取王臣之威重皆以為第一
先是上一日夢殿前菜苗生與堦齊既唱名聞蔡齊乃
召見久之曰得其人矣遂以為狀元其著於辭形於夢
見於形如此非偶然也

歸田錄

全火及第

進士張詡臨淮郡洪儒也徐宗孟全照蔣洙之輩皆師
事之雍熙初與二三子同拔本州解赴京師是歲十月
初淮水已淺澁旬日方到符離宿於關門外舟中夜夢

上岸盤旋間有人安放交椅一把在岸次謂乃就坐之
忽為推墮於地曰此是全火交椅爾安得獨坐遂覺至
春榜果全登第其他同解俱及第焉

勝說

崔圓為相

崔圓少貧賤依親人李彥先時為刑部尚書待之不甚
加禮一夕李夢身桎梏同輩百人為兵擁入大府呼姓
名領過判云准法李視見紫衣人據案乃崔也躍出哀
叫紫衣人曰李彥先特收禁流汗而覺自是厚待之因

薦之楊國忠後遂以知留後旬月拜相京城尅復李公授僞官與陳希烈等二百人合誅崔為中書令詳決之際以姓名呼過判云准法李大呼曰相公豈不憶昔年所禱耶崔乃悟遂判李彥先收禁具表其事請贖罪許之流嶺外昔日之夢何其神歟

唐逸史

錢生楚州

慶厯中司法叅軍錢某赴任處州夜夢至一廳與祖考同席坐忽見一人以緋抹額召錢某作鬼官荅云已授

處州司法矣乃固請其祖厲聲曰更候十四年應曰若更十四年自當往楚州矣夢覺惡之後為發運馬仲甫所舉充楚州排岸而卒時正十四年矣

史國

李概斫足

濮州李植與弟概赴省試一夕夢奏名將出同榻而寐概忽驚叫植問之曰夢人以刀斫其足覺猶微痛明日概預奏名後數日因間行有人拜於街中乃濮州軍吏云喜六郎過省某今隸名貢院昨以六郎書榜某幾遭

答捶問之何也乃曰六郎之名乃木旁既某誤書既下
木主司大怒然將逼出院許修改無異則免罪責遂以
刀子刮其下木幸而得免叩其修字之時乃概足痛之
際植嗟異久之

幕府燕
閒錄

東坡大吳

蘇子瞻學士少時夢謁於公府主人紫衣面赤而多髭
謂軾曰君是大吳覺以告父弟皆不悟也是時子瞻年
十四歲後十四年舉賢良中選詣御臺謝知雜王綽既

入門儼如夢中視綽乃夢中人也既坐謂子瞻曰君是大吳兄弟相顧而笑因請其故綽曰前日賢良就試綽與彌封以大吳為卷號是時意君為第一今則果然亦問其笑乃以夢答賓主大歡久之

幕府燕間錄

魏清除代

魏清累舉進士未第逼春闈夢一烏衣云魏公勉旃將來當同陳臯蓋臯凡八舉是歲第五人喬舜座下及第而清復退飛常恨夢之無據後三載清乃於張洎座下

及第亦以八舉時陳臯為餘干尉既滿清亦除是尉以
代焉科名仕宦前定如此可以為躁進者之戒

南史

殷袞文學

將作監張殷袞燕人也時劉守光為燕主有尼出入於
國太處殷袞託彼尼求一文學終不得一日張夢見大
城衙署多簿書而無人乃潛登廳事見案上大簿云天
下職官姓名張喜檢河北道便見劉守光及文武職掌
莫不有名張乃取筆自書文學張殷袞書記書畢墨色

尤淡遂下堦出門驚覺汗洽于背乃誌之於論語策後
至明忽有數騎至云大王急召張往至衙有人賫一牒
云與校書郎文學牒也遂授之其母國太謂劉曰我與
尼數言不與何忽授之劉曰彼有分昨夜三更有一朱
衣吏謂我曰張殷袞已注下為文學訖故與之及得牒
其姓名墨果甚淡至晉天福中其子希永常出論語策
子以示人戒躁進云

錢希白
小說

周琬角書

周琬湘中人端拱三年進士及第歸後將赴闕再調至
澤州宿次夢二吏云大王請遂行至南岳廟升殿見王
曰知員外將入調只欲辟在此中與人間不殊且無衣
食之念如何琬辭王乃索筆吟詩送之云住此既非樂
捨此去何圖若問青氍事惟留一角書琬覺異之既至
京師乃病于客邸琬慮不起遂扶力為書以寄其家凡
一角封訖而卒與詩意無異信乎死生注定卒不可逃

也

名賢
雜錄

草制前定

何繼太平興國中任秘書丞度支判官故王尚書化基任著作郎開封推官繼忽一日在省凭案而寐夢入一官府如中書制勅院或官或吏憧憧出入皆若有所除授其中喜者沮者相半皆形於色繼見衆人紛紛亦前詢問到一房見一朱衣吏據案而坐簿書堆積如堂後官之狀因前揖之問所來繼曰衆人皆有除改某預數否朱衣若有所閱視徐曰亦有候王化基草詞因出而

夢覺遂言于王公不兩月王果超知制誥又數月續授
虞部員外郎出知邢州官誥果王之詞後錢內翰希白
作洞微志集諸名賢小說自此為草制前定云

名賢
雜錄

孫蟾除官

孫蟾邢州人也雍熙三年堂除鄆縣尉未授官寓建隆
道士院一夕平曉夢入官府曲池生蓮華蟾入門西小
院窻盡碧紗忽一吏抱文書出蟾問此何所吏曰除官
院孫意欲除河北官心甚速遂擘窻紗窺之見三吏在

旁據一案一吏唱曰孫蟾除京兆府鄆縣尉是范舍人
詞一吏曰蟾非進士范性剛莫不肯下筆又一老吏曰
當制舍人不草更教誰草又一吏在後抵聲曰范舍人
尚取伊作小試官右司理無不草之理蟾聞除開中官
甚不樂忽聞撞鐘遂覺後月餘果除鄆尉果范之詞既
赴任二年范自刑部郎中知京兆府明年發解取蟾為
小試官又奏授右司理叅軍夢中之言無一或差錢亦
標為草制前定

錢希白
小說

錢丕得官

錢公希白之姪名丕天禧元年任將作少監長子師古
任廷評監建州豐國監例以考滿合叙遷一夕丕夢入
一府見一吏趨走有若掌官誥者丕揖而問之何也曰
建州廷評轉官第二廳舍人叅假草詞及覺以班次排
之乃令彭城中憲筠第二廳也近在假多日更旬餘忽
叅假當日師古果轉衛尉寺丞劉當制焉此亦草制前
定也

洞微志

錢公自述

錢內翰希白自述云余淳化三年落第堯堦之下便久
卧病于京師五月六日伏枕困睡忽夢有老道士請登
一紅泥壇握手曰成名二十六章服二十九時年二十
二心極喜謂果然則進趨稍達也無何十年詞場不開
咸平元年又以暮服免咸平二年方叨第時已三十二
矣意疑夢之無證細思而後得之云二十六非二个十
六乎隱密神告之言其前定若此至於二十九章服之

兆則已過矣後捷制策通閏籍直集賢宰南部凡十五年五品之消息寂無聞焉及攝鴻臚少卿又修道書凡四上殿奏事皆是二十九日又無恩命不可望也及修道書畢與秘閣校理慎鏞並蒙改賜章服時大中祥符九年四月二日於閣門受賜秉笏之際見笏上大書二十九字詢之庫吏云此笏是第二等第二十九面也笏尚前定況官名乎時士大夫皆異之惜其字不敢洗去

者數日焉

洞微志

化成得鴈

員外郎趙化成嘗夢與友人張某坐庭中忽有一鴈自天而下徘徊庭中共掩得之明日詣張言之方坐庭中果有一鴈下於庭際因共逐而得之相與驚駭乃以帛為詩繫其足放去又有人夜夢所持繖柄折明日果折夢得一狐翌日果有人送一狐此最微事而猶有前定如此猖狂之士視此可無妄動

秘閣間談

張洎二驢

叅政張洎常夢至一處行路有泥濘兩旁皆葭莩有二
驢在後從旁過及使回至登州岸時潮退泥水載塗路
在葭蘆中少頃果有二驢後至皆昔日夢中所見嗚呼
行止果非人歟

同前

鄭滂鳳字

進士鄭滂久在場屋頗有後時之歎一夕夢及第與韋
周方同年至太和初有韋景方者尚書弘景族弟也因
避景名更名為周方滂聞之喜是年滂果及第與周方

遂同年又其子溥曾夢看及第榜但大書一鳳字大中
元年乃以鳳翔貫求解卷卷首便是鳳字至東都試
山月夜聞子晉吹笙詩左右諸詩悉有鳳字果登第焉
嗟夫一鳳字猶有前定耶

翰苑
名談

吳奎論題

吳文肅公奎將舉賢良一夕夢魏文帝升殿問羣臣優
劣或曰韓延壽為最是夕門下抄書吏楊開夢公讀楊
阜傳朔日告公公異之即取三傳熟讀及秘閣試六論

燕談

一題乃韓延壽楊阜孰優論公因此遂膺褒然之選

渾水

王獵侍從

王獵酸棗人天聖末累舉未第一夕夢紫衣吏召至一
宮門揖入升廳對拜者紫衣金帶年三十許覺後私記
其年月獵後困於塲屋以推恩得同出身既登仕版又
二十年且七十始為尚書外郎將乞身歸人或止之會
英廟入繼近臣薦公為宮僚赴宮則門欄守衛宛如昔

日之夢及升廳拜揖則衣冠儀貌皆如所夢也歸視篋中所記乃英廟始生之夕公侍講宮邸未及朞年英廟即位遂登侍從仕宦進退皆自有時烏可妄覲耶吳文肅公天聖末與獵友善親聞其詳

同前

彥祖天字

王彥祖慶厯時初名元宗赴廷試應天以實不以文賦罷寢旅舍夢一人告曰今年未當中第彥祖甚不平之其人曰君中選時賦題天字在下君當三中選皆然今

題天宇在上第二是以知其未也及唱名果不預至八年再赴廷試蓋軫象天地賦又復黜去皇祐五年免解赴禮部大疾困眠夢至一處見二人乃懇求平生祿命二人笑指前面水池曰待此水分流君即登第既覺自謂池水必不分流決無中第望矣久之乃改名汾以符水分之兆及試禮部嚴父莫大於配天賦廷試圓丘象天賦皆中選後召試學士院又賦明王謹於事天得帖職皆符昔日之夢異哉

同前

劉滋吞印

劉郎中滋累舉不第年餘四十始遂登科嘗夢有人提印滿籃令吞之印但任意吞看吞得幾顆滋不得已吞至十四顆其印皆顧見於股上後果歷十四任而終

青箱

雜記

文公剃髭

李文定公迪美髭髯未御試前一夕忽夢被人剃削俱盡迪甚惡之有解者曰秀才須作狀元緣今歲省元是

劉滋已替滋也是歲果第一人

同前

孫相填名

孫樞密抃舊名貫應舉時嘗夢至官府潭潭深邃寂寂若無人大廳上有抄錄人名一卷意以為春榜遍覽無名偶覩第二名下有空白處抃欲填之空中有人語曰無孫貫有孫抃夢中即填孫抃是歲果第三名因字得

夢

同前

丁序唱名

丁咸序應舉時夢唱名已過續有一龍蜿蜒騰上又有
一駱駝繼之比唱名有龍起駱起二人在其後

同前

國隆黑豆

龔國隆應舉時夢行道上步步信指黑豆一掬是歲鄉
薦伯父郎中恤其乏路費以驛券與之遂泐路勘請抵
京師即步步掬豆之應也

同前

分門古今類事卷七

欽定四庫全書

分門古今類事卷八

夢兆門下

鄭獬白龍

鄭內翰獬未貴時病疫困甚夢至一處若宮闕有吏迎謁甚恭公曰吾病煩熱思涼浴以清肌膚吏云辦之久矣遂導至一室中有小方池甃以明玉水光灩灩以手測之清冷可愛公坐其上引水沃身俄視兩臂皆生白

鱗顧水中影則頭已角出公驚遽去吏云玉龍池惜乎
公不入其水入當大貴但霑洒而已幸而公是白龍翁
雖貴不至一品乃覺大汗而愈公後登第為天下第一
乃戲為詩云文闡數戰奪先鋒變化須時自古同霹靂
一聲從地起到頭元是白龍翁平生以文章擅名而終
不至登庸亦前定也

青瑣
高議

楊礪記室

楊礪周顯德中赴舉京師嘗夜分獨坐恍然見一人衣

冠甚古謂礪曰汝能從我游乎礪從之至一官府儀衛
嚴肅引礪升大殿見一人姿貌甚少面南而坐引者謂
曰此來和天尊也異日為爾之主礪再拜而寤建隆初
礪擢第真宗為襄王以礪為記室既謁見藩邸歸謂諸
子曰今日襄王乃昔所夢來和天尊也殆冥數乎

幕府
燕閒

錄

曹確剃髮

曹確判度支有台輔之望忽夢剃髮為僧心甚惡之有

一人占夢多驗確召使占之其人前賀曰侍郎旦夕必登庸夫出家者號剃度也無何杜相公出鎮江西確果

大拜

措紳
勝說

雋宗神告

天聖四年海州書表雋宗遠夢有神告之來年狀元是王堯臣宗遠寤題於司房北壁是年秋賦開封府解榜到見王之姓名因指謂同列曰此是明年狀元洎省榜到見王又預奏名雋再題於壁未幾殿試王堯臣果魁

多士至和中畢景儒仲詢之父知海州親訪其事備載

於幕府燕閑錄

搢紳
勝說

淳化看蛇

淳化三年省試後張君房夢入一大第東壁下有黑漆
連椅坐一婦人紫衣如節使家知客手持筆硯陳列君
房前請賦詩罔測端緒忽見從文司諫出曰奉贈詩一
首可自寫之乃曰亭尤逢夜竹寫畢司諫曰可用郵亭
字續曰不識自知音朦朧望明月終得拂青塵寫記呈

覽次忽大蛇自條床下出忽聞人大唱曰看蛇遂驚覺
占之多不解後踰紀至景德乙巳年君房始忝科第豈
蛇之兆乎

張君房
自占

景德隨棺

君房應二舉敗於垂成每當失意時必夢二三陰人跨
驢迎引至塵忝御試之夜亦懼其前夢比至宵分頽然
而寐乃夢隨一棺槨行于總幕中望之不見其蓋於中
但裝瓦石龜其背意且訝之即前觀之復見二足自膝

而下出於棺槨前若新死者前一人呼號因而問之其人曰一人李沆一人李至因嗟訝而覺亦自知其吉兆矣來日果叨名第然不解二李之因今亦解曰二李者狀元今大名相公應李沆也故樞密李諮應李至也何其神哉夢三十年後始辨之

同前

戴昭領錢

君房三舉及第年夢涉昏霧泐蔡河東行旋憩一茶肆中有公吏若承符狀殊不相揖據上位而坐君房慊之

拂衣而起旋見舊識進奏官何果者君房因言其人果
曰亟往求之此是秀才將來手分君房悟是冥司乃出
訪之其人已出門外乃揖謝之其人曰秀才將來名第
某必把手拽上也君房又謝之然其人似有所求復有
言若邀其多少之限君房曰若向及第奉銀錢十萬貫
其人大感意似過所望也既別數步又回曰秀才將來
化錢必與誰君房曰亦不知與誰氏耳其人曰某姓戴
名昭本江南人奏錢日但呼戴昭即自領也景德二年

果登第成名後三日乃償其夢人之名第陰司自有主者孰非前定乎

同前

刁湛賦詩

咸平中刁郎中湛拔潤州解赴舉京師會其父典合肥得替相會於解舍父喜其來因語赴舉次第是夜父夢被召既入門見張齊賢自內而出曰比部請賦七言詩曰聖朝文物古難過何事寒門寵遇多父向石渠新拜職子從金殿又登科須教枚馬慙蹤跡堪笑巢由隱薜

蘿報國報君何所有一心待欲枕長戈既覺已四鼓召
湛記之來春孫暨榜湛不預名第父子以夢為非驗也
是年秋即就天府求解向春過省比部自二月初授命
俵散山東鹽逼御試一兩日間方回翌日御試乃於殿
門外閣子中坐伺湛之得失忽一大程官奉勅一道來
呈學士已授秘閣檢討喜慰方甚又一橫門官急來云
學士秀才第一等及第父子同日俱被恩榮至夜會話
所夢合肥之詩云父向石渠新拜職子從金殿又登科

何其神哉

勝說

濟陽築宅

濟陽丁公謂嘗因月夕召李虞部畋坐於涼堂因語及
宅基始甚卑濕初應舉年僦此屋一間居之蓋與錢內
翰宅往還甚近一夕夢白衣老人告吾曰君能築起此
地於上安宅必拜相矣吾後官給事中總判三司因憶
老人之言適值役夫淘蔡河運土併遺填之坎窞基址
悉皆平正遂建茲宅於上今果忝三事矣誠宅之祥歟

天之命歟應之曰有開必先蓋天命也

該聞錄

懶瓚垂訓

丞相濟陽公丁謂夢懶瓚師訓以覺悟之理及覺憶夢之象坐一山庵中俾畫工圖之其年丁貶崖州司戶道經潭州宿雲居山海會禪寺因縱步見一山庵歷歷如昔日之夢訪彼僧則曰南岳懶瓚大明禪師庵嗟惋久之遂捨白金五十兩建道場供千僧以答夢中之訓自撰疏云伏以佛垂徧智道育羣生凡欲救於傾危必預

形於警戒謂白衣干祿叨冢宰之重權丹陛宣恩忝先
皇之優渥補仲山之袞曲盡一心和傳說之羹難調衆
口嘗於安寢忽夢清容妙訓泠泠俾塵心而早悟貞義
隱隱恨凡目以何知蓋以智未周身事垂遠害既禍臨
而不測或灾及以非常黜向西京感皇恩而寬宥竄於
南裔當國憲以甘心咎寔自貽孽非他作念一家之散
處思萬里以何歸既為負國之臣永乏還邦之日程由
湘土道假雲山正當煩惱之身忽接清閒之衆方知富

貴難保始終直饒鼎食之榮豈若孟羹之美特形皈命
恭發精神捐捨白金充修淨供饌苾芻之高德報懶瓚
之深慈冀保此行乞無他患伏願天回南矚澤賜下臨
免至邊城白日便同於鬼趣得歸中夏黃泉亦感於聖
恩虔罄丹誠永翳法力濟陽後復官為金紫光祿大夫
秘書監致仕卒于光州詔復籍初公為布衣時過淮南
遇道士曰他日大貴然似李德裕而稍優焉果如其言

僧伽同行

泗州大聖僧伽傳云和尚何國人也又云世莫知其所從來云不知何國人也近讀隋史西域傳有何國予在惠州忽被命責儋耳太守方子容自攜告身來且弔予曰此固前定可無恨吾妻沈素事僧伽謹甚一夕夢和尚告別沈問所往答云當與蘇子瞻同行後七十二日當有命今適七十二日矣豈非前定乎予以謂事孰非前定者不待夢而知然予何人也而和尚辱與同行得

非夙世有小緣契乎

東坡毗陵後集

辟支佛記

至道元年六月十四日夜張君房夢涉水田間西南行
遙邈上一山行二三里意甚怠之及半塗望南邊有一
佛宮門廊皆織高竹籬籬之東北上有一廳事遂抵之
見西柱一帖云應來往賓客只請于此乃不敢直進而
坐於小木床上逡巡一僧自中出年可四十許與客相
接欣然衣紫背褐裙搭械而已乃索君房左手揣之且

扼其臂者三云秀才他日當為某官君房樂聞之告誠女師言他日將何相報然不知此處何所也其僧不答君房又詢之意欲為文以誌其寺舍僧亦不言君房堅請之僧若不得已曰此聞喜縣也於是乎覺自是十餘年不能辨景德二年春君房叨第六月八日蒙恩除將仕郎試校書郎知昇州江寧縣事冬十月赴任十二月
中奉州帖差准郊裡赦勅設祭于縣之牛山既出時雨雪新霽泥薄載塗涉田畔夾畛西行迤邐而南儼然當

年夢中之路時日色遲暮取山前通途弗及乃由山後
及二峰間下望崇教精舍後有編竹障之比上佛室登
其殿亭即昔夢廳事復觀西壁上題云往來君子不請
書破壁又夢中之帖也洎瞻禮尊像宛然昔夢之僧也
噫自京至金陵水陸數千里乙未至乙巳僅一紀之間
所夢與今事跡所見無毫髮差異何其神耶又益信謂
食祿有地乎亦未知君房過去百千生中曾遭辟支佛
而如君房通誠與之授記預告以所官乎聞喜之語非

及第之信乎君房虔服靈夢誠不敢忘故直筆書之刻石於佛前亦夢之宿心也寺有舊記云辟支佛自吳天紀四年至唐以來凡示現者六矣今君房之夢抑又示現之一焉景德五年初八日記

東坡集

黃牛廟詩

歐陽文忠公為峽州夷陵令日所作黃牛廟詩軾嘗聞之於公曰予昔以西京留守推官為館閣校勘時同年丁寶臣元珍適來京師夢與予同舟泝江入一廟中拜

謁堂下予班元珍下元珍固辭予不可方拜時神像為起鞠躬且使人邀子上耳語久之元珍私念神亦如世俗待館閣乃爾異禮耶出門見一馬隻耳覺而語予固莫識也不數日元珍除峽州判官已而予亦貶夷陵令日與元珍處不復記前夢矣一日與元珍泝峽謁黃牛廟入門惘然皆夢中所見予為縣令固班元珍下而門外鐫石馬缺一耳相視大驚乃留詩廟中有石馬繫祠門之句蓋私識其事也元豐五年謫居黃州宜都令朱

君嗣先見過因語峽中山水偶及之朱君請書其事與
詩當刻石於廟使人知進退出處皆非人力如石馬一
耳何與公事而亦前定況其大者公既為神所禮而猶
謂之淫祀以見其直氣不阿如此感其言有味故為錄
之正月二日眉山蘇軾書

東坡集

張君房靈夢志

淳化癸巳仲冬之晦張君房適自茂苑來客餘杭時抱
瘡瘍之患遽有告曰凡經游是郡者當謁吳山神祠即

伍君子胥也今封王爵君房聆之聳然曰是故宜至誠耳王古之忠鯁在楚楚彊來吳吳霸及其去而死之則吳亡楚弊故得耀美清湘流芳祀典迄今民不忘其庇斯盛德者歟翌日恭謁于廟熏爐滌爵質辭以心默禱冥祈肅拜而退時初陽盛景愛日方中載步林亭西望闌闌樓臺出沒煙靄浮沉若水若山如繪如畫夾道有寒梅十數株已爛熳矣凝懷抒思比暮而回是夜夢上一山迨半間有新創佛宮中設尊像數身殿偏門內一

道人手運壽牌約長二尺餘如今之桃符狀君房揖之
道人曰此籤也意若今之道家十二真君所著撰者也
君房曰身蹇多剝欲一卜之可乎道人乃出籤牌抽之
引一牌有朱書大字二行凡四句每句五字曰時來自
有期此去不憂運行心但如此非久銷疾病甫讀于口
意亦知其吉告矣感激而別既下山百步忽聞梅香回
望其上乃昨日所見之花爛然在目因驚悟曰此吳山
廟也於是遂覺其清香芬馥滿衾枕間良久方歇自是

瘡瘍之苦浹旬而愈於戲靈神之告也若是乎君房自
祥符乙卯冬十月改官領錢塘之命王祠即部之名勝
也非時來自有期乎自淳化癸巳冬距祥符乙卯南至
爰蒞錢塘今又三載妻子溫飽身跡安泰豈非王之陰
賜乎今考秩告滿將遠靈祠苟不揭文志石即不獨曠
於宿心亦負王之靈告也因鑱而壁之冀人知王之靈
應事天禧三年秋九月二十一日著作佐郎知錢塘縣

事張君房記

該聞錄

先大夫龍泉夢記

眉州青神縣
有龍泉神廟

大觀乙酉歲如璋避親移試漕臺四月初吉率親友十數人溯遊龍泉乞靈於昭惠王祠方時神光晃耀報應示祥人皆震動而欽奉之某心專意誠默有祈嚮忽一僧未通名字來附耳語曰公春闈定捷竊怪其語無倫詢所以知之稱能相形唯唯而退初不信其言亦不究其工否是年拔漕解次年果叨第自京師歸抵鄉舍纔三日其僧來訪乃澄照堂元通也始云某寔非相入者

一日前夢皓首素衣人來語某且汎掃祇候翌日有官到此因問官實誰是答曰執香合者是也姓字為誰曰宋南仲也至日諸人皆來或持澡羞或捧盞各各不同獨官人最後至乃執一香合因闡詢名氏皆合夢中之告以此知高選無疑昔日未敢明言託之相耳於戲神之靈報灼灼如是烏可不書今歲孟夏宿澄照堂元通話前事聊記其始末且知人之吉凶得失皆素定於冥兆非由於人力以至動靜語默亦有其數如持一香

合猶已定於前神得而知之況其他哉古人謂神氣發越精識所通乃為吉夢之殊祥如璋不才虔服靈夢誠不敢忘謹鑱於石以報神貺政和七年三月日宋如璋

記
該閑錄

蒲教授荊山夢記

宣和癸卯冬十月咸臨還自成均遊華山靈臺觀晚宿荊山驛夜分夢一老人衣冠甚偉策杖來謁自稱姓王名安石議論英發袞袞可聽且曰人生當無書不讀廼

探懷中數簡見貺指云宜先討究孟享一事少選遂覺
自是徧問諸友皆莫知其所謂幾二十年不復省記矣
紹興壬戌秋八月來尉繁江備員御容殿香火官四時
孟享實預行事始符夢中所說私竊怪之未幾游邑庠
而王氏父子遺像在焉粉墨剝落塵埃滿面忽憶荆山
之夢令人驚歎不已迺命工摹諸壁上以永其傳庶酬
曩日之報然公以妙齡侍其先公殿中丞宰此邑時天
聖七年也距宣和癸卯近百年矣而精爽逼人能以未

來事告後進且不忘其艸角遊戲之地豈凡輩耶謹月而日之以誌公之英魂俊魄尚在塵寰而人之仕宦早晚皆有前定不可以強求也紹興十四年四月中澣三

崑蒲咸臨記

該聞錄

劉悅第三

劉悅字聖與天彭人蔡薳榜第三人與常璩同年又相善方集英賜第聖與歎息若有所感璩因詢之聖與曰人生得喪果素定非人力也悅今日望見天子臨軒公

卿侍衛以至天日氣象樓殿相映恍然如再至焉悅七年前過梓潼神君祠宿于祠下夢與舉子數百人趨禁中聽唱名於集英殿俄有一衛士遽曰公第三人及第悅時名濤因問曰劉濤耶衛士曰無劉濤乃劉悅語未畢臚傳劉悅矣遂驚覺雖知其神而未敢改名會元祐詔書若與上書入等人同姓名者聽改名時上書有彰信軍進士名劉濤悅因改今名焉今日至庭中無一而非昔日夢中所見者初聞第一第二人已賜第不覺正

衣冠以待及蒙恩果第三人而心寔安然若久已得之者信乎得喪果前定非人力也崇寧五年悅歸過梓潼既書其事又託常璠為記

靈應集

孫鉉策題

大觀元年孫鉉歲貢辟雍乞夢於英顯神君是夕夢赴試有一人賫策題而立因就讀之見第一題問某事餘皆如之其人曰錫讌津亭郡國舉賓興之禮計偕給食多士忘奔赴之勞用之可以取高第既覺記之於書及

就試則所問策題皆協于夢如其言用之果中優選豈
特人之富貴前定而文章亦自有陰相之者

同前

文績狀元

何臬文績政和間被貢宿梓潼夢一吏齎黃勅投其中
云何臬可特授承事郎秘書省校書郎次年文績果大
魁多士前此狀頭先除學官惟文績獨除館職暨受勅
銜位與夢中所見不差一字嗟夫科名前定如此士而
不安義命可乎

同前

處厚類試

杜居寔字處厚遂寧人政和間夢川中放省榜三十四名而杜預其數覺而怪曰省榜不下三百人且省試在京師不當在川蜀自是二十餘年而不能曉至建炎初朝廷以艱難路隔分路類省試杜居實在潼川類試過省中選者果三十四名其夢始驗此可以見一第皆有前定而非人之能也不然何二十年而其應無毫髮之

差耶

同前

元珍贈詩

桂林字元珍資州人大觀末貢于京師宿神君祠下夢
人贈詩一聯云樓高先見月柳嫩更含烟覺而不曉其
意是年登第授唐安教官因遊郡園亭中見詩榜乃前
人詠唐安之什不唯報其登第之兆而唐安之任亦前
定於此矣

同前

彥國文學

羅彥國字伯達成都人累舉不第至第四舉齋戒乞夢

於梓潼神君時蔡相元長當軸是夜夢元長謂曰已奏
除公樞密直學士矣次年羅又省下詣府投牒乞進舉
推恩遂授密州文學蓋密學之應也

同前

士美金堂

朱士美臨邛人宣和初被薦入京宿梓潼祠下夢遊一
室棟樑戶牖皆以金飾之後年登第乃調金堂尉其事
與前元珍無異科名固有前定况食祿之地豈無前定
歟

同前

任豫交代

任豫字由道青城人與余先君友善崇寧二年登第歷官數年而卒至崇寧五年先君繼亦登科一夕夢與任豫交代心常惡之未幾先君丁家艱服闋授新津尉時前尉亦以憂去州檄監稅兼攝尉職暨先君赴上權尉遣人下遠迎視之乃一武人亦名任豫乃知昔日之夢與任豫交代為不虛此可以見前定也

靈驗記

允蹈甲門

邵行甫允蹈紹興被薦成都未類試前齋戒徒步詣七
曲山乞靈於英顯神君其夜夢神謂曰已與卿安排甲
門高第至次年果為類試冠乃刻石紀其夢于廟之西
廡意謂夢之應兆皆驗于此矣及為江陽幕官考滿赴
闕將遂調改行次湖湘以病卒于閘口鎮乃知昔日之
夢不惟報其魁捷兼報其捐館之地也神哉神哉

靈驗

記

何某二子

資中何與時如震宣和間免解赴闕其二子被薦侍行
齋宿祠下夢神君顧左右言曰何某德行操修留二位
與其二子次年二子俱登第噫神君英靈顯著煥耀今
古間以未來先兆託夢于賢士大夫無不應者況何君
之厚德有後宜為神之所祐也


靈應集

照鄰闕牀

朱照鄰景祐中舉進士夢造棺闕牀而弗成是歲雖過
省御前下第晚因推恩得一文學乃棺不成之應也

青箱

記



分門古今類事卷八